

四庫全書

集部

欽定四庫全書

集部

竹潤集卷七

八

詳校官中書臣孫溶

中書臣劉源溥覆勘

總校官知縣臣楊懋所

校對官助教臣胡予襄

謄錄監生臣馬步蟾

欽定四庫全書

竹澗集卷七

明 潘希曾 撰

墓銘狀碑祭文二十三首

東溪居士陳君墓碣銘

浙之義烏有曰東溪居士者葬邑西楊村其子勤以墓
文請予與居士同郡而勤嘗從予游故聞居士之風舊
矣雖不敏弗容於辭居士姓陳氏諱俊字彥秀號曰東

溪世居邑之倍磊為聞家其先有曰垠者任松楊教諭
垠傳綜徐州知州綜三傳為啟聰甫樂善好施壽而且
康即居士父也居士質性剛毅不事表襮讀書了大義
自少子立無兄弟事父盡歡喪母哀而有禮處宗族無
間言調鄰黨不靳嘗建居室以抑畏為扁衆目之曰此
謹愿人也歲饑應募輸粟有司榮以冠帶辭弗受又目
之曰此古朴人也里閭之求直者率恂恂片言解紛以
去又目之曰此忠直人也夫孝事其親仁睦其族而行

義重於鄉之人一命弗沾一善莫名居士之於為人果何如也世有所謂隱君子者其殆斯人歟其殆斯人歟卒正德二年三月二十七日享年五十有五配朱氏有賢行子三人曰惟正曰勤曰惟榮皆克家勤尤性敏嗜學駸駸嚮用居士隱德將藉以顯矣銘曰倍磊陳氏太丘之裔雲仍多賢德星恒麗湜湜東溪居士樂只源深流長比德之美仁不必壽維名之垂才不必用維後之貽楊村之原穹碑在焉百世而下可誦以傳

處士義翁潘先生墓碣銘

婺源處士義翁潘先生既卒葬邑北之硤石源其配胡孺人附焉正德辛未子錡舉進士奉先生從弟玉卿僉憲所為事狀請銘於碣錡嘗從余游而玉卿與余同年進士以是稔聞先生之風按狀先生諱瑛字玉英義翁其別號世居邑之桃溪其先閩之三山人唐末逢辰者避亂於此因家焉高祖諱侑隱居行善當洪武初法禁嚴切獨以謹厚全門戶曾祖諱虎克世其業祖諱勤成

年二十早世父諱烟資幼孤長克自立以子貴贈文林
郎蘄水縣知縣母齊氏贈孺人繼母胡氏封太孺人先
生兄弟四人行第二其季曰珏官至福建僉憲先以治
縣有績獲贈封父母云先生天性孝友肯堂肯構嘗作
棣萼聯輝樓以怡兄弟學士篁墩程先生記其事平心
率物不吝施予好詢人所行失得勇於克己宗族鄉黨
咸愛且敬强者愧屈罔肆弱者得藉賴自立一日見餓
夫墮溝中衆委之去獨起而飲食之得不死人稱之曰

義翁先生聞而笑曰斯名詎取當顧名思義可也自是
居常器用悉書義字蓋取盤銘之意性敏善記憶凡學
庸語益典謨訓誥皆能默誦雅好觀史客至與論古人
成敗歷歷指掌喜獎進後輩族黨賴以成者甚衆教子
弟尤勤故僉憲君輩先後登庸為時名臣錡方接武仕
途潘氏之所以益昌大者不偶然也孺人雲峯先生八
世孫崇陽尹濬之姊勤儉孝敬協德於夫每誦雲峯言
曰一日苟存願存一日好心願為一日好人旦必焚香

祝天務積陰德以貽後嗣比先生歿天心教子脫簪珥
為費要於其成而後已克婦克母先生生正統辛酉以
成化丙午卒春秋四十有七孺人生正統己未後先生
十六年卒春秋六十有二長子銓次鏡次即錡長女適
高安程鳳次適富春吳深孫男五人天潤天活天清天
潮天漢孫女四人銘曰賢哉義翁不愧其稱人則稱我
我斯服膺賀賀斯世惟利是趨不詭以隨由我坦途宜
其家人義形于內宜兄宜弟義著于愛子孫多賢維以

義方鄉閭化之義聞孔彰孰利不害孰義不利賢哉義翁以克永世

漁隱先生潘公墓誌銘

弘治乙丑七月二十一日我伯父漁隱先生卒其子海門司訓榮之官舍扶柩歸葬寓書京師俾希曾銘其墓希曾時居諫司會多故未果越十三年乃克造銘勒石追瘞壙前嗚呼痛哉先生諱瑋字用夫姓潘氏世為金華儒籍曾祖諱彥亨洪武中徵取人才祖諱文華贈監

察御史父諱洪官至廣西按察僉事贈奉政大夫修正
庶尹母吳氏封孺人贈宜人兄弟六人長諱璵官至無
為州節判次即先生次諱瑄次諱璋官至陝西按察副
使贈中憲大夫希曾先府君也次諱璠次諱環先生自
幼隨宦京邸佩服庭訓兄弟自相師友諸經子史多涉
獵攻詩善屬文後從少司寇滁陽劉公游造詣益深景
泰甲戌僉事府君卒於官時長兄不在側先生奉母攜
弟妹歸喪萬里以禮襄事既免喪慨然歎曰老母在堂

吾兄既縻於官吾不能復離膝下求仕進也諸弟勉之於是一意孝養愉婉承順務得親之歡心甘旨饋祀門戶一不以累其兄若弟如是者二十年母宜人以壽終節判府君遷轉三州先府君亦已成進士官朝行矣天順中郡縣薦先生才德辭不就後屢以鄉飲請皆辭不赴成化乙巳訪先府君於蜀縱覽山水而歸弘治庚申就海門之養優游五載尋卒先生天性醇樸篤於孝友父母在不忍一日去左右處兄弟怡怡無間言教子姪

講授不倦與人交謙恭以和生長宦族而能甘淡薄樂
隱逸人尤難之自棄舉子業古文益高詩極清婉書得
歐虞筆意妙自成家晚年放情觴詠與星齋錢先生諸
耆碩為北山詩社士大夫求文者交於門因家雙溪之
涯自號漁隱鄉人稱為漁隱先生而論君子者必曰漁
隱漁隱所著有應酬稿湖蜀紀行錄若干卷先生生宣
德己酉正月十八日享年七十有七以卒之明年某月
某日合窆於朱氏安人墓在武義縣柘塢先塋之側安

人邑名族南京刑部員外郎璉之女年二十一歸先生甚宜於家姑年高得末疾安人晝夜扶持經歲無倦容尤注意教子家政內助居多成化癸卯五月三十日先卒其生在宣德庚戌十一月四日享年五十有四男子二人長即榮今陞龍溪教諭次植側室楊氏出女子一人適永康王玻孫男四人燧焯焮燿孫女二人銘曰惟潘氏居婺儒籍有聞詩書簪組是貽是承嗟我伯父其生振振祿弗自取惟以成弟昆學不必用世其家以文

孝友自靖儒素終身評高於鄉報在其子孫

福建按察司僉事進階中順大夫潘公墓誌銘

公諱珏字玉汝姓潘氏其先閩之三山人唐末逢辰者
上書闕下不報避亂於歙徙婺源之桃溪遂家焉厥後
世有聞人譜牒具存曾祖諱虎祖諱勤成父諱炯資贈
文林郎蘄水縣知縣母齊氏贈孺人繼母胡氏封太孺
人公賦性醇篤自幼劬書十歲作詩有驚人語十有二
歲從鄉先生張文輝受尚書歷五寒暑學成會戶當遠

後而母病兄弟皆弱時署府事閻經歷以御史左遷公持詩文謁訴閻才之遺補邑庠生免其役天順甲申也是年冬齊孺人卒戊子蘄水卒蘄水初得疾為公兄弟析產以水田若干畝佐讀書既終喪公請於諸兄合爨肆力問學作風樹圖以寄哀學士篁墩程先生守制休寧公以所學往質之篁墩恨相見之晚曰君名進士也成化癸卯領鄉薦連登進士乙巳奉檄督賦南畿明年授湖廣蘄水令公至縣閱倉粟得六百斛駭曰令為民

父母而水旱無備奈何爰下令取贖刑及訟紙咸入粟
縣治中門兩旁建倉貯之號阜民倉越二年大旱盡發
倉儲以賑貧乏簡下戶丁壯分隸上戶俾得傭作自給
多種麥為來年計復勸分助賑以濟不足是歲饑不為
害自是益廣儲蓄更建倉縣治之北號聚民倉前後積
粟八萬餘石久益賴之縣之南門渡恃舟以濟水涸易
以木梁歲費百金不免覆溺之患公合二年費為浮橋
經久不病又以廟學湫隘闢而新之作興士類每為講

授成材甚衆邑故多盜公令鄉民聚居列柵啟閉盜乃
沮義官劉洪者實黠盜其子恥與同惡洪殺之事洩亟
遣人分捕并獲其黨十數輩既而司府將脫之公具獄
請對卒如公按初荆府致幣於公公對使封貯官庫別
以禮報之嘗使人諷公欲婚其子公不可既又以所作
畫來賜公為啟事辭謝於是王知公不可干矣久之王
以罪廢公無染焉治蘄凡十二載秩滿當去賦別思詩
士民遮道共立去思碑李教諭復取別思詩梓傳之名

甘棠集弘治戊午遷金華同知率如治斬而職專清戎
尤慎勾稽未嘗徇權勢為取舍有蘭溪民誣姪夜毆叔
殺其救妾縣官治姪死罪寃累年莫辨公閱成案見其
初驗屍時不云何衣悟曰此必就寢所計殺之也豈有
婦人裸而救鬪者耶詰之果服坐叔故殺罪而出其姪
巡按陳君不悅曰獄屢經臺憲矣何是矛盾耶公爭之
陳不能奪三載奏績便道省太孺人於家有歸志還次
嚴州投牒告繳部檄郡人士相率挽留而上官亦弗許

尋就職乙丑武宗即位公入賀陞福建僉憲奉勅督理
屯田明年正德改元公上任考簿書革奸弊豪猾侵尅
之徒悉寘於法屯政漸復一日監斬夜歸病不能寢食
歎曰戮人不當其罪而力不能救何以仕為乃遣人上
京乞骸骨時逆瑾擅權所知恐其得禍勸止之尋以鹽
法忤中貴人中貴人陰主去公戊辰吏部書公年老致
仕瑾猶坐以他事罰米百五十石時公六十有三得謝
為幸云歸數月太孺人卒居喪執禮休沐十有五年足

跡不出山惟赴鄉飲避寇兩至縣耳優游林泉文詠為
樂夜課諸孫誦習不倦訂輯譜牒作勸善碑於道側睦
族化鄉之意老而彌篤嘉靖改元今上皇帝以尊號覃
恩進階中順大夫其年七月二十九日公卒生正統丙
寅五月二十四日享年七十有七初號雪竹軒入官曰
澹翁晚更萬卷山人人多稱澹翁先生云所著有甘棠
集三觀稿晚遊錄澹翁稿雲萍唱和展驥集桃溪族譜
凡若干卷公質直自信好義不好名久資常調世罕知

其為人半生仕宦攜家者僅四載清苦儉素終其身可謂之古君子矣配吳氏邑名家女封孺人生正統乙丑十一月十一日卒正德辛未二月二十二日享年六十有七葬邑之齊村程家坑公平生不內顧者以孺人賢也男子七人鐸鎡鎮欽鎰鉛錄鎮邑庠生鎡鎰鉛錄早卒女子一人適同邑引禮舍人胡琨孫男十人濟滋潢河沐澍泳澥津澎濟滋皆邑庠生潢連舉解元進士為樂清令有聲孫女八人曾孫男一人士懋曾孫女二人

鐸等將以卒之明年某月日奉柩合葬吳孺人墓乃狀
公行裨鎮走千里來乞銘昔公倅金華希曾以諸生受
知嘗遣鎮洎從子錡受學錡後登進士而公從弟玉卿
憲長與予同年故最為知公不敢以不敏辭銘曰舉世
脂韋以苟富貴直道事人不卑下位俗雖不合民則我
懷令邑倅郡循良之才晚奉璽書僉被閩臬風裁獨持
權璫見厄載歌歸來幅巾深衣古貌古心為鄉人師噩
噩遺集不朽之器矧子若孫厥美世濟人之不遇一時

謂何天定勝人公得孔多程坑之陽有封若芥公斯合
葬其永千古

封孺人劉氏墓誌銘

孺人諱祥字淑鳳姓劉氏順天府丞菱溪石公之配大
鴻臚介菴府君之子婦父諱廷茂國子上舍母柴氏二
族皆滁之望故上舍擇壻必求如菱溪者孺人性聰慧
幼習姆教稍長通書數年十六歸公逮事姑王宜人姑
悅其孝夫賴其賢及公舉進士官京師以姑年高不忍

離留侍於家公尋以監察御史進階孺人遂有封號已而公按廣東王宜人壽終孺人黽勉大事竭其哀誠初以不克隨宦勸公置側室視其子不異已出晚得痰疾甚危既蘇謂公曰吾旦夕且不保宜及吾存為二子計乃均分貲產無毫髮私其所出又以母柴無後迎養十餘年迄送終焉以勤儉居富貴以恭讓處娣姒以讀書守身教子孫奉賓祭必盡禮御臧獲務使得所樂善賙貧終其身不衰凡宗黨語內則莫不稱孺人云孺人生

成化丁亥四月五日以嘉靖癸未五月九日卒得年五十有七男子二人繼芳國子生繼先庠生女子一人許嫁士族繼芳嫡長也孫男四人坦庠生餘幼孫女二人卜葬於城南龍蟠山白水村之陽將以其年之十二月十日襄事公乃手狀淑行丐余銘余寓滁頗久雅與公善聞大夫士稱孺人之行如公言乃為之銘銘曰詩詠葛覃以著婦則載歌螽斯式彰母德婉婉孺人衆美在躬以宜其家以代有終命服光華偕貴君子德音不磨

貽範閭里惟茲窳窳白水之陽勒辭堅珉千載其藏

孺人李氏行狀

孺人姓李氏金華處士王先生之配進士銓之母也父諱寶觀金華名族有隱德母王氏孺人自幼端淑工女紅為父鍾愛嘗指謂母曰是女他日必能昌大其家及笄歸先生舅克厚翁一見異之曰是婦福器過人吾宗其賴之孺人修舉婦職協相家政王氏之產日裕以隆初為冢婦諸叔尚幼躬為縫浣飲膳比就外傳恒竭力

資給叔瑁早世以其子為後至壯猶為諱護不令自
已出瑁遺一女與孺人女年相若且先後嫁孺人憫其
失怙裝資必加厚焉姑邵嘗目之曰新婦好心地如此
他日有好子孫是其報也先生善教子孺人一意贊之
量諸子資性教以治生讀書各有專業弘治戊午銓舉
浙江鄉試第三人明年成進士孺人每得報輒愀然曰
吾舅姑望吾兒久矣顧弗及見莫告墓所哀若初喪其
誠孝尤能追遠如此居常儉約至於禮賓郵族曾不少

靳處妯娌得其歡御婢僕得其力撫諸姪若已出故卒之日闔族大小痛惜之不獨其所親之哀也孺人生正統丁卯九月十三日卒弘治庚申正月二十五日得年五十有四男子四人長鑰次錦次即銓次鐸為叔瑁後女子一人適同邑周某孫男二汝謙汝嘉孫女一皆幼以卒年夏五月己亥葬城西畫堂先塋之側壬戌之秋銓詣其友人潘希曾請狀其事飲泣具道如此嗚呼婦德如孺人可無稱述使就泯沒哉曩希曾在鄉校與孺

人子銓相友善蓋嘗知孺人之為母矣銓少俊敏士人多樂與游孺人教以尊師取友遠無益交儕輩有為游戲者銓輒不敢近曰母將不悅也尤好為子聚書聞有典籍不吝重購一日比鄰弗戒於火延燒且迫時銓適他出孺人倉卒攬取羣籍一切蓋藏棄不暇顧是皆卓卓耳目所覩記者其可使無聞哉肆并述之以竢立言君子采焉

令尹呂侯去思碑

人有久而不能忘事有無所為而不能已此德澤之孚而人心之公也義烏縣令呂侯盛去邑且三載邑之者民陳良積輩將刻石以繫其思乃介醫官陳節之丐予文予蓋嘗識侯者而節之予友也其言曰侯建平人也起家進士莅吾邑凡六載始至聲色不少動久之民安士習胥若徒咸畏以服去之日衆弗忍舍既去益思之至於今不已其政則農桑學校是急抑強植弱平徭息訟取力於隙而百廢興殖財於儉而上供備約俗於正

而異端詘條教有式追呼不擾用是家給人足風俗淳
美當時臺臣具薦於朝而侯不以喜暨被徵命顧眷眷
若弗欲棄去者蓋侯之績莫可殫述而侯之心誠不忍
吾民矣吾徒野人思之不置則圖所以繫其思而傳於
後微吾子之文則亦無所繫而不必信於後之人予
聞而歎曰民不難感亦不易感也撫我則德虐我則怨
世蓋有疾視其上者蓋有攘臂以亡其上者况乎去而
思思而不忘若是耶詩曰樂只君子民之父母謂能子

其民而民父母之矣又曰永言孝思孝思維則謂人子於父母思慕之不忘矣然則侯之見思固可以觀德而若等所為惓惓茲舉固可以驗人心之公假使上出於干譽下涉於獻諛則去未必思思未必久而茲舉也未必待今日矣夫又奚取哉昔者子產遺愛孔子稱之何武去思史以為美談愚敢竊附其義為若等書匪惟繫一邑之思抑以示勸於將來

祭外舅太守梅澗先生文

鳴呼坦夷豁達町畦不立思公之德其古遺直作牧名
州甘棠勿拜思公之政其古遺愛歸休二紀文酒自娛
官不滿能惟後之貽年高七十太平遺老歸全造物曷
挂懷抱我先大夫公表兄弟不才受知館甥于貳言念
疇昔垂髻侍側撫我誨我期我成德既長筮仕驅馳靡
寧歲月幾何訃音路聞棺不知殯窆弗及瘞拊膺痛心
慚負無地始自策勵將用報公迂愚忤時速戾厥躬賦
命自天何尤於人矢心弗渝敢墜大恩我酒既醉我殽

亦薦陳辭敘哀神其來鑒

祭湛母太孺人文

惟靈德媿孟母子成鉅儒操觚翰苑黼黻帝圖惟帝乃
嘉恩封是錫冠帔輝煌式章有德潘輿就養萊綵承歡
優游壽域聿終天年某託交賢子獲拜北堂瞻望弗及
敬奠一觴尚饗

祭盧母文

惟靈夙抱懿質長歸名門主饋貞古竭誠藻蘋禮相夫



君家道日熾借老八旬為人中瑞厥有賢子克由義方
歷敷中外端委班行祿養既娛板輿方導俄焉告終豈
天弗弔某等鄉里後生通家末誼緘詞遠將一觴敬酌
尚饗

祭太守徐廷實文

惟公性敏而淳行恭以和問學夙成登名甲科仕逾一
紀平生不渝明慎刑獄累遷大夫惟賢惟能帝心簡在
擢守大邦藩垣攸賴一卧三冬竟以不起慶門未集弔

途俄啟生稟之懿孰其畀之勲業之就孰令已而豈山
川清淑之氣偶鍾人世倏散而逝雖造化亦莫知其所
謂嗚呼生死旦夕彭殤何殊公於此理諒已不疑顧公
之遺憾若在其身後而縉紳之流涕則悼夫仁者之不
壽公易箚時援筆作書有姪曰杲可以後予公之繼室
名門令德育孤承祀矢死靡慝惟茲得所亦可以死死
而有知目終瞑矣某等鄉里朋舊義同兄弟死喪之懷
曷其有既方圖舉公之棺歸葬東窆薄奠致誠眉宇如

見嗚呼哀哉尚饗

祭孫母文

嗚呼修短隨化物理之常惟德之懿可以流芳閨壺之行無非無儀惟子之賢厥德可知昔者軻親侃母皆以其子有聞百世之下雖死猶生安人篤生賢子甲科蜚英清才雅識慈範具存俄一疾以溘逝亦何歉於遐齡某等宦遊是邦辱交令子一奠之陳情弗能已尚饗

祭憲副鶴軒戚先生文

嗚呼古今人世惟壽匪易然壽或不足於富貴而富貴或不免於子孫之累豈造物無全功而人生難乎其值抑多福自求而本乎有德之致先生登名甲科歷官臺寺早辭金紫之榮久樂林泉之味諸子競爽宦學世濟孫曾繩繩引之弗替是以身康心寧逍遙九十歸然人中之瑞矧先生儒業世承苦節自勵居鄉抗正直之風在公著冰蘖之譽不詭不隨惟禮惟義此先生德之可見者而福壽所自也某等鄉里後生猥託姻契緬懷儀

金匱要略卷七
型悼茲長逝將微忱於薄奠庶來格之不昧尚饗

祭俞夫人文

猗歟夫人夙嫻姆教作嬪於俞尊章是孝惟勤惟儉葛覃之風子孫蟄蟄螽斯其同相厥夫子歷敷仕路三紀勲名罔復內顧夫子之賢惟邦之楨晚荷簡注掌憲帝廷來自南服夫人爰及榮膺誥封入朝宮掖翟冠霞帔有德之章胡弗遐壽一疾溘亡某等辱知夫子咸仰內則一奠之將不勝哀惻尚饗

沛縣飛雪橋祭大河文

惟河導自積石會歸於海潤澤厚土通利舟楫功施博矣邇來河南支流多淤專趨沛徐遂貽運河之患茲非神意實任事者之責也某奉天子明命來治河事方議疏支河以殺上流修長隄以保運道躬率官屬閱視至飛雲橋敢竭誠致祭用祈神休惟神祐國祐民相予成功以報天子神其鑒之尚饗

單縣祭后土文

邇年黃河橫溢運道屢淤天子特命某來治其事既議
疏支河於河南以利導之爰築長隄始於單之林臺歷
豐以迄於沛將以防橫溢而保運道也茲者卜吉興工
敢告於神惟神鑒之佑其成功尚饗

沛縣飛雲橋再祭大河文

去歲之秋天子以河患未弭漕渠被淤特命某來治其
事謹嘗告神疏支河於河南以分上流築長隄於沛豐
單以防傍決方今春和厥工並興而裏河舊淤亦就挑

濬庶幾運道通而河患不復作也凡此實賴神休相其
成功惟神鑒之尚饗

單縣再祭后土文

往年河溢漕淤頗妨國計天子特命某總理其事既疏
支河於蘭陽滎澤以分其勢爰築長隄於單豐沛以障
其溢今厥功告成漕渠以寧實厚德默相之力也敢申
祭告以彰報謝惟神鑒之永祐皇國尚饗

滎澤縣孫家渡祭大河文

自九河不分河患頗殷大明御宇地平天成雖間嘗決
溢亦治以寧邇年支流堙塞單豐沛下決漕渠沙淤糧
運阻澀惟是孫家渡故道可尋上命巡按河南御史督
濬甚勤河伯效順忽決若傾人力因之厥功告成某叨
總河事來視茲隅幸渡口與趙皮寨口二支並疏庶下
流永奠而運道無虞也敬陳牲醴用報神休惟神鑒之
翊我皇猷尚饗

山川壇祈雨文

社稷城
隍同

贛自六月不雨以至於今秋陽益驕晚禾日瘁民庶皇
皇罔有攸賴匪民之辜實吏於土者不德之致某忝鎮
南邦良切競懼謹率羣屬惟神是籲神其早賜甘霖我
民允濟謹禱

開平忠武王廟祈雨文

王開國元勳遺澤茲土廟食有年民實賴止今曠旱滋
甚百穀將死王其終惠我民大沛甘雨庶我百職咸荷
靈祉謹禱

江東廟祈雨文

惟神顯靈在在仰之矧是章貢為桑梓墟有災輒禱固
民之私有禱必應亦神之宜自夏迄今旱魃猖披民則
既病神豈罔知某恫瘝在身爾神是祈甘澤不靳三日
為期謹禱

靈山廟祈雨文

古者國有凶荒則索鬼神蓋人力所不及舍神無以致
其誠某憂時之旱不能為時之霖賴爾靈山降雨出雲

庶幾相予濟此困民謹禱

竹澗集卷七

欽定四庫全書

竹澗集卷八

明 潘希曾 撰

雜說譜例家記贊引題跋四十九首

雜說二十一首

七九皆奇數而九加多故九為老陽七為少陽而卦之
陽爻稱九六八皆偶數而八加多故六為老陰八
為少陰而卦之陰爻稱六或者不得其說以為聖人

扶陽而抑陰殊不知天地生成之數始於一終於十
自兩儀生四象觀之太陽居一而含九少陰居二而
含八少陽居三而含七太陰居四而含六此理數自
然之妙非人為也或曰何不直以一二三四為陰陽
老少乎曰六七八九成數也

今周易乃費直易程子因之作傳如乾坤卦爻辭下附
以彖象文言猶不失四聖之序如各卦辭下附以彖
象各爻辭下附以小象錯亂殊甚田何易十二篇乃

孔氏之舊顏師古謂上下經及十翼呂伯恭定為經
二卷傳十卷其序上經一下經二上彖傳一下彖傳
二上象傳三下象傳四上繫辭傳五下繫辭傳六文
言傳七說卦傳八序卦傳九雜卦傳十是為古易朱
子所為作本義者也世儒復析本義以附程傳何也
天下事貴思不貴疑然亦有當疑者乾之九四或躍在
淵无咎子曰或之者疑之也故无咎

龍陽物也坤之上六不言陰與陽戰而曰龍戰于野聖

人扶陽抑陰之意也王介甫謂陰盛於陽故與陽俱稱龍謬矣

訟凶德也不慎於始不得已而訟貴能止也不能止而求終焉雖勝猶凶也子曰天與水違行訟君子以作事謀始絕訟之道也

彖傳謙尊而光卑而不可踰程子謂謙則尊光自處雖卑而不可踰朱子謂謙則居尊者德愈光居卑者人亦莫能過據小象卑以自牧及繫辭謙尊而光觀之

程說得夫子本意

六十四卦惟謙內三爻俱吉外三爻俱利可以崇德可以濟事可以存位故君子謙之為貴

重坤純陰十月之卦也十月非無陽也陽甚微也故程子曰十月謂之陽月恐疑其無陽也蓋陽雖剝於九月實漸盡於十月之小雪雖復於十一月已自小雪漸長積三十日而成一陽也邵子詩云冬至子之半天心無改移一陽初動處萬物未生時陽非冬至頓

金匱要略卷八
生也冬至而一陽之生方成也

一陽來復於五陰之下曰復往而為臨為泰為大壯為
夬以五陽夬一陰夬盡為乾則陽極而陰生矣一陰
上遇五陽曰姤往而為遯為否為觀為剝以五陰剝
一陽剝盡為坤則陰極而陽生矣陽生則復矣陰生
則姤矣一歲十二月往來於乾坤十二爻矣

蒙以養正培其本然之善也童牛之牯禁其惡于未發
也蒙與童教所先也

明出地上晉君子以自昭明德大學曰自明曰明明德
蓋本諸此

明夷之為卦也內離外坤離明也坤順也晦也文王內
文明而外柔順箕子晦其明德不違乎其時也是以
免於難也然而文王演易箕子敘疇當明夷之時而
開文明之運者天道也

節之九五得中故曰甘節甘者味之中也上六過極故
曰苦節苦者炎上之味也

古書疑字不宜輕改曲禮鸚鵡能言不離飛鳥猩猩能
言不離禽獸吳氏纂言改禽作走殊非蓋禽獸乃飛
走之通稱如易田有禽書外作禽荒皆通稱也周禮
大宗伯以禽作六摯孤執皮帛卿執羔大夫執鴈士
執雉庶人執鶩工商執雞則羔亦可曰禽也考工記
天下之大獸五脂者膏者羸者羽者鱗者則羽亦可
曰獸也

仲春鷹化為鳩天地之仁心見矣其秋也鳩化為鷹天

地之義氣形矣先王使鳥獸魚鼈咸若仁也田獵以禮義也

見父之執不謂之進不敢進不謂之退不敢退不問不敢對無與於事親也而非愛敬其親者不能也故弟子知此禮其不孝者鮮矣鄰有喪舂不相非厚於州相周黨相救也而哀死之情易相感也故鄰里存此禮其不恤者鮮矣

有無其禮而善處者以義起也將軍文子之喪既除喪

而后越人來弔主人深衣練冠待于廟垂涕洟是已
有有其禮而弗拘者可與權也童子汪錡能執干戈
以衛社稷魯人欲勿殤是已有過為之禮以譏人者
非足恭也公儀仲子舍適孫而立庶子其喪也檀弓
免焉司寇惠子廢適立庶其喪也子游杜麻經焉是
已抑交游杜麻經非禮也子游曰禮也者豈以將以
正禮為禮乎

成人有其兄死而不為哀者聞子臯將為成宰遂為哀

楊綰拜相而郭子儀減聲樂黎幹省騶從夫有諸已者其動人不難也

月令之書可以考先王順時之政而不可泥也如春行慶賜秋始行戮之類道其常耳非謂事幾當速者亦必俟時也如仲冬齋戒掩身以待陰陽之所定即周易先王以至日閉關也如孟春行夏令則雨水不時等事亦猶洪範之敘咎徵也柳子厚謂其苟以配五行而施政令離聖人之道又謂風雨變異特瞽史之

語何其泥哉是書雖出於呂不韋乃假手諸儒所為
要之未純在擇焉爾矣

詩一發五祀朱傳云祀牡豕也據爾雅北祀恐牡字誤
豕牡曰豨春秋傳盍歸吾艾豨是以豨去其勢曰殞
易殞豕之牙是已

漢高起於楚沛我朝興於金陵非自南而北耶金元之
承運非自北而南耶王莽李林甫輩非北人耶陸贄
張九齡范仲淹歐陽修輩非南人耶王子明據其本

朝事言且知立賢無方所言未為害理邵堯夫天津
聞鶻之說蓋前知一時氣數特因物而發耳愚者遂
執以為通論所謂癡人前不可說夢也

譜例

姓氏之所從來遠矣時代變遷其上世多不可知吾所
可知之世吾尊以為始祖可也譜圖界上下旁行上自
高祖下止玄孫為五世玄孫再提為九世又再提為十
三世以至於無窮圖後略疏名字事蹟為傳各以其世

列馬異姓冒嗣者不得書同姓而失其宗派者不得通譜凡嫡長子繼始祖者族人世宗之所謂大宗也繼禰者兄弟宗之繼祖者同堂兄弟宗之繼曾祖者再從兄弟宗之繼高祖者三從兄弟宗之所謂小宗也大宗百世不遷者也小宗五世則遷者也世遠族衆其勢必分續圖譜者各自其所親之為玄孫者提馬以下繫其子孫亦小宗意也而皆以吾譜冠焉則大宗可互見也譜掌於宗子支子各藏其副每歲必會族以讀之生子長

孫增書之是為譜之例云

記先祖遺翰二首

右書四通我顯祖廣西僉憲府君手蹟也歲月具書中
惟第三書不具歲月考之行狀御賜五經四書五倫書
在景泰辛未也三書皆得之表叔吳康十丈吳則我祖
妣姪也第四書乃與長伯父無為州節判者是年顯考
陝西憲副府君暨四伯父諱瑄者將赴鄉舉故書云爾
其末曰清慎勤曰謙恭小心雖為節判府君一時丁寧

之言實吾家世守以為家法者也嗚呼字心畫也言心聲也思吾祖而不可得見得見其心於片言隻字間則所以感詒謀之遠而念繩武之大者不在茲乎顧自宣德至今日九十餘年希曾生而早孤得此於淪落斷爛之餘不啻殷彝周鼎而其為吾家舊物尤不易得謹識之以遺後人

我顯祖廣西僉憲府君沒世既久其手澤幸存者鮮矣右秦疏洎內臺諸公氏名蓋景泰初為御史時所書希

曾近檢諸故笥裝次為卷傳曰先祖有善而弗知不明也知而弗傳不仁也茲疏係立朝大節非細善比也昔柳子厚記其先友於墓碑之陰後之君子猶得考其卓然知名者二十人矧吾祖手列一時官聯氏名名公頗多其中如鈞州馬公後至師宰顯考憲副府君洎希曾又先後與之同朝世講之誼尤足徵也為後人者尚其知此而珍藏之

記先君奏疏後

右先君奏疏先伯父漁隱先生手錄者也疏在成化二十二年奏准至今為著令弘治二年先君以陝西憲副卒於官時先伯父尚康健痛先君功業未竟手錄遺文遺事備史氏采擇距今已三十年而先伯父捐館十有四年矣幸此疏僅存也嗚呼觀此一疏而先君之建明先伯父之友愛與我憲宗皇帝用人從善式閭封墓之盛節皆可見矣疏已載先君集中先伯父詩文稿亦甚富從兄龍溪教諭榮方圖入梓希曾獨念此盈尺之楮

具見衆美謹識其後俾潘氏子若孫永傳焉

恭記御賜先臣勅後

右先大夫手錄憲宗皇帝所賜勅也先大夫以僉憲提學於蜀者七載日夕兢惕恪遵聖諭一時士風丕變人材奮興我國家菁莪樂育之化大行弘治改元陟陝西憲副提學孝宗皇帝復賜之勅視此勅詞一同惟地方職銜有異耳故事臣下領勅事竣則進繳惟提學勅例得不繳今二勅皆寶藏臣家龍章奎翰增輝永世臣希

曾逮事孝宗皇帝追惟兩廟上賓先臣溘逝伏覩綸音
不勝君父罔極之感謹拜手稽首而記其後

記先君遺翰後

右先君遺墨凡十帖略依歲月先後為卷時一展觀永
我罔極之思禮稱父沒而不能讀父之書手澤存焉爾
夫書謂典籍蓋可以他求者也以父嘗讀焉而弗忍讀
讀別本可也乃若手蹟遺訓不可以他求者也苟諉於
弗忍讀焉而蔑棄之非所以學箕裘善繼述是惡可不

讀也諸帖或拾之故篋或得之故所往還家視先君靜
虛集有小異者有逸不載者蓋集嘗更刪潤而此則厥
初未定之稿與一時應酬之筆耳并識卷末以告我後
人

記舊譜序後

右時舉潘公譜序特詳三潘之所自來而謂富不能以
皆富貴不能以常貴而清者之後亦不能守其業夷考
其時尚在元初去三潘之盛未甚久也而物換星移已

有不勝其慨者後百年為我朝兵火薦更無怪其子孫
寢微而世次不辨也近時上虞潘孔修憲副雖不敢祖
月林嘗輯清潘遺事一編自言得默成月林二公御勅
於山陰宋君翰又得宋勲臣潘公美父子行實小像於
越城士人乃知子孫不能世守顧不若異姓之好事重
可慨也予錄時舉公序而復書此於後俾後之人庶幾
知潘氏之故而又知所警省云

記高侍講送行序後

右序得諸故篋殘缺磨滅僅存首尾九十七字蓋宣德中我祖僉憲府君掌教於淮安府之鹽城我曾祖贈御史府君嘗往遊焉此其歸而送行之作也若我高祖徵士府君召問朝堂奉使江右之事獨賴此序可見惜弗覩全文而其事之始末不可知已故家遺文雖片楮隻字子孫可輕視哉

書五賢遺像卷末寄兒紹

此五賢遺像一卷付兒紹收各像跋語乃西涯李文正

公手跡公文章德業推重一世作此字時行年將六十矣而莊重雅飭一畫不苟如此觀者不待望履烏聆聲歎可以想見其為人矣後生潦草宜常捧觀以自警發倘由是而有進則五賢地位亦吾分內彼丈夫也吾獨非夫也耶紹其勉之

宗伯童公贊

名軒號枕肱道人

浩乎其學之博確乎其志之卓故偶聖逢辰則猷為昭焯而履危歷坎非利害可奪完壁而歸枕肱自樂茲其

所以為當世名臣為後學先覺也耶

王處士遺像贊

生彼勝國歸我皇極百五十年遺像可則氣清形灑隱
德之符布素恂恂漁樵為徒讀書循理一鄉善士餘慶
所鍾視其孫子

吳處士存恭像贊

身長而癯貌古而澤鄉稱善士年逾大耋僅僅治生端
木氏之貨殖孜孜濟物孫叔敖之陰德親賢而賢者與

之混世而世俗取則吁嗟若人三代遺直

滁陽話別詩引

予兄柏軒先生由泰州司訓擢魯府滋陽王傅將之任過滁話別於是兄在泰凡九載希曾以太僕寓滁亦且八載而兄因便過滁至是蓋三度矣念予與兄自幼同學未嘗一日相舍比長筮仕離合不常往往託之聲詩以寫其悲歡思慕之懷則友于之情不能自己者耳魯有周孔遺風而宗藩仁賢吾兄此行竭誠所事以無負

朝廷簡任之意亦云慰矣第陟岡興懷弗勝繾綣爰賦
一律為吾兄贈而凡平日悲歡思慕之作亦附書之以
識歲月他日同老林下歌此於山雲水月之間而相與
賡和焉又將感慨今昔益敦壙篋之好云

赤松圖詩引

金華號山水佳地而赤松特勝宦遊以來常往來夢寐
間頃因良工繪圖攜以自隨每一披玩輒注目久之甲
申秋雲南憲副朱子文先生來京以永州十三志見示

公之永予之金華也山水之勝殆不相上下而予之弗
文不能如公之志永以志赤松則欠事也公且行爰以
圖贈而題其後公其念與我同者不獨山水也尚為茲
圖文之

贈葉先生詩引

予與葉師道先生自少同事筆硯而先生先大夫予之
外舅也先生幼書攻文有經世志予賴其麗澤良深三
十年來不意誦薄者偶試而才大者難為用茲授羅源

司訓非其好也亦安於命而已矣為賦一律識別

贈鳳山秦公詩引

往歲癸未希曾為南京太常適鳳山秦公以大司馬總
留務幸獲奉顏色承謦欬以慰平生無何改官北寺方
以去公左右為恨而公尋被召為大司徒退食之餘又
幸獲請益也惟公文章德業被今而垂後見乎羣公贈
送之作者殊未艾也希曾拜觀諸作敢綴一詩於後蓋
公為天下慶而私以自幸云

治河錄引

戊子之秋予奉命治河明年冬厥功告成都憲梅國劉公督漕過濟詢予所從事曰盍錄諸庶將來足徵乎乃俾書史錄其綱要若干篇有勅旨焉有奏議焉有文移焉有祭告之辭焉有書若記焉勅冠諸首餘篇依月日序次於是始末可觀矣是役也弭河患通國賦祇若皇上德意不敢不竭其愚若夫荒度利導壹是皆本其故而不敢以智鑿云

題章賢母傳後

自古母氏稱賢率於其子之成立如所謂孟母蓋尤彰彰焉者余讀列女傳觀孟母之所為教亦誠難已其自謂夫死從子則稱未亡人久矣而卒成子之大賢可不謂難乎余嘗歎古今人未必不相及而事之難易有弗容槩論者及讀章賢母傳不能不重感焉母之以賢稱視孟母未知孰難迺若方盛年時贊夫子以廣圖厥胤中道而喪所天又能忍死以成其側室之子皆情之不

易克也禮稱婦順備而後內和理內和理而後家可長
久說詩者謂后妃之德不妬忌故有樛木螽斯之福今
章氏孝子順孫玉立蘭茁而先世之業日昌以大微母
之賢而至是乎推母之心雖為事君者法可也獨內則
也哉儼諸孟母之所處其難易又不同矣

題李太白畫像

昔人以落月照屋梁猶疑見顏色為李太白傳神詩予
每讀杜集至此未嘗不三復想見其人一日過中丞何

君汝弘見壁間畫像若道家者流諦視之衣冠偉異風
神瀟灑惜綃地剝落題識無存君曰此太白本來面目
也會稽東山寺舊藏此像暨王逸少謝安石靈運三像
近世為貴游摹寫易去者乃元與國初所臨其逼真者
宋時所臨寺僧秘之世復罕見然皆非其舊也董內翰
文玉雅與其主僧善頃偕予訪之主僧具道茲事爰出
本來四像於木柱中以二謝授文玉以王李授宇亦以
其最久最弊不堪顧惜耳予惟物恃形以存者雖銅狄

石人不能久而不壞區區毫素乃垂若千年之久而可
觀而轉相臨摹者又將蔓延於無窮則四先生所為景
慕於人人必有不恃形而存者矣抑東山王謝桑梓其
有遺像宜也不知何緣有太白像史稱白天寶初南入
會稽豈當時慕而貌之耶今脫木柱之藏裝飾一新後
之觀者尚有以驗杜詩之善於傳神云

跋林都憲察院題名記

院署之有題名俾可考也可考則其人其政其名位所

到勲業所就有不容以掩者而勸戒彰矣大中丞長樂
林公家藏此刻乃廣西察院所為題名者也公在弘治
中嘗以御史按廣西去之二十載遂以右都御史總督
兩廣回視列名諸君子上下百餘年間勲名赫然無出
其右者蓋公之盛固不待是以傳而是刻將藉公以為
重然猶手之不置抑以自考也此古人不自滿假之心
而公之所以過人者歟宜其位益崇功益懋勒鼎彝而
垂竹帛不特斯名之題而已也往時公僉浙憲某在諸

生中受知最久敢附其說以致景仰之私

跋林都憲平蠻奏凱卷

大都憲長樂林公弘治中以御史按廣西決策運籌削平諸蠻一時能言之士相與歌誦之題其卷曰平蠻奏凱後公累遷今官奉勅巡撫兩廣遂總軍戎之務焉蓋公胷中甲兵素所蓄積當時歌頌之者已卜其有今日矣孔子嘗謂有文事必有武備又謂不出樽俎而折衝千里公得之矣視彼佔卑陋儒平居誦說唐虞倉卒不

能一時退敵者豈亦吾夫子之教使之然耶三復茲卷
不能不為之太息

跋先世遺翰三首

我顯祖廣西僉憲府君景泰初為山東道監察御史手
書彈章洎聖旨移文凡二通希曾近得之從子燧拜觀
之餘敬裝為軸歸之俾謹藏焉昔冢宰鈞陽馬公序我
祖哀詞有云文升登景泰辛未第亦拜是官得從先生
之後者數年先生正色立朝風采凜然凡院中陳大事

劾大奸奏疏彈文多經先生之筆觀此則當時疏草宜不止是惜散逸無存俾我後之人惜於世德可勝痛哉
燧於我祖為曾孫實吾門繼曾之宗傳曰公侯之子孫必復其始燧尚懋之

我伯父漁隱先生早承家學攻古文歌詩雅意泉石不求仕進故形之聲詩率皆沖淡蕭散而無枯槁迫促纖靡豪誇之病所著有應酬稿湖蜀紀行錄其子龍溪教諭榮悉攜之任而其孫燧復輯逸稿四篇如右蓋手蹟

也希曾伏讀仰思恍乎耳誨言而目儀範也敬識數語
以泄其悲且以嘉燧之念爾祖云

右三書我顯考陝西憲副府君手蹟也一上我祖妣諸
父一與我從兄一上我漁隱伯父當時孝友之誠宛然
可覩從兄之子燧乃能什襲久藏間以視希曾嗚呼吾
親遠矣罔極之恨曷有窮已昔人有言讀孔明出師表
而不墮淚者其人必不忠讀令伯陳情表而不墮淚者
其人必不孝矧在其子孫耶三復之餘收淚識此以授

燧燧於此將感發焉不亦吾門賢孫子哉

跋宗譜記後

予之為譜不能上遡三潘而祖其所當祖斷自所知八世祖者為始祖矣猶恐其無以自別而久而復混也則因高祖始居雙溪定為雙溪潘氏宗譜夫萬派同一源也而必祖其所知必別其始居何也親吾親也親親而踈可推也故曰人各親其親然後不獨親其親此理一分殊之旨也

跋聖教序後

右唐太宗作聖教序高宗作三藏聖記各有荅沙門玄奘書附其後又附玄奘所譯心經皆沙門懷仁集晉王右軍書咸亨三年刻石今在西安府學咸亨距今八百五十年矣此帖子家故藏相傳已百年字體遒勁不失右軍筆意可寶也

跋定武蘭亭帖後

右定武蘭亭真本自唐太宗得右軍手跡命歐陽詢臨

摹勒石久之流落定武復失於宋之南渡翻刻紛紛而定武本多贗矣我朝宣德中東陽何公士英為兩淮鹽運使浚井得之世復鮮知正德戊寅淮陰胡汝愚來尹東陽從何氏榻數本貽予千年名刻一旦快覩其五字劉損仰字如針眼之類悉符諸家辨證而字畫之佳實異他本則不歧辨證而可知為真定武也

跋孟英三碑後

右宋僧孟英篆千字文乾德三年刻石其十八體書刻

於乾德五年其篆偏旁字源又刻於咸平二年而書法
之工則當時陳希夷諸人歌詩洎郭忠恕書非溢美也
三碑皆在陝西此乃弘治初先君以憲副督學時所榻
家寶也



竹澗集卷八